



Tir Yimyim

www.tiryimyim.in

Regd. No. RNI. NAGAAO/ 2004 / 13113. Postal-NE/RN-717.

e-mail : tiryimyim@gmail.com

TAPAK 3

Yangia anidakangma :



Tir Yimyim



tir_yimyim



tir yimyim

TAPAK 8

Tayimtsü tsükokba lendong nung
taoba Gujarat CM, Rupani asü

ISSF World Cup: Sift Kaur
Samra-i bronze medal angu



VOL. XXII ISSUE NO. 239 (ADOK 239)

DIMAPUR

ROGONÜ (FRIDAY)

AAMI (JUNE) 13, 2025

₹ 5.00

Ahmedabad nung tayimtsü tsükok: Nisung 200 dak tema asü

Ahmedabad, Aami/June 12 (Agencies): Brehostibarnü Ahmedabad airport anasa Air India indang tayimtsü ka tsükokba nung nisung 200 dak tema asü aser ka takum kumzük.

Iba tayimtsü nung passenger 232 aser tayimtsü ketdangsür 10 liasü, cabin crew nung Manipur tsür ana liasü aser nikongdang 1:17 ako nung London-i aotsü ayamesor mapang tatsüka tsüngta BJ Medical College and Hospital nung tsükoka nisung aika asü.

Air India Boeing 787-8 Dreamliner nungya India nung 169, British nung 53, Portugal nung 7 aser Canada nung nisung ka mena liasü.

Ahmedabad nung Meghaninagar area anasa Dharpur nungi mokozü adokba meta talang nungi ngua liasü. Fire brigade aser emergency response team tem iba tesem nung lir aser ketdangsür iba lendong atalokba kuli ano mejangjatei lir.

Asürtem rongnung taoba Gujarat chief minister Vijay Rupani densema lir, ta Union Minister CR Paatil-i ashi.

Ato Kilonser Narendra Modi-i asükhü lemsatepogo aser Home

Minister Amit Shah aser Civil Aviation Minister Rammohan Naidu den jembiogo.

PM-i minister ana dang Ahmedabad-i oa akok tashi yariteptsü shia liasü.

PM Modi Hombarnü Ahmedabad-i arutsü imlar.

Tayimtsü ya iba medical college indang doctor tem hostel nung tsükoka ali nung aliba kaketshira kar asü ta ashir.

Tenük kuli alirtemi video tangokba nung tayimtsü ya akhi mapang ama mesüi alilen yima ao, kong meta talangi aotsü atema totzü sünga inoker aliba yong mi tali jangrudaktsü ta ashir.

Ahmedabad indang police tekolakbai BBC dang ashiba agi, nisung 204 temang ngutetogo aser nisung 41 mozüki nung anepalutar.

Iba lendong atalokba osang angashia linük balala lenirtemi asükhü lemsatepogo.

Item rongnung UN Secretary-General Antonio Guterres, US Secretary of State Marco Rubio, Russian Tir Vladimir Putin, Italy Ato Kilonser Giorgia Meloni aser Philippine Tir Ferdinand Marcos Jr nung 7 temi asükhü lemsatepogo aser Home

Commissioner of Police, Dimapur ajanga tenokdangba agütsür

Dimapur, Aami/June 12 (TYO): Dimapur Airport li nung ozüng alema ali agia aliba azüngtetdaktsütsü teimla nung Dimapur Police Commissioner ajanga Bharatiya Nagarik Suraksha Sanhita, 2023 indang Section 163 kübok tenokdangba ka agütsüogo.

Office of the Commissioner, Nagaland, Kohima nungi totuyuba agütsüba aser Gauhati High Court Principal Bench ajanga May 27, 2025 nü obendang agütsüba aser iba sülen Deputy Commissioner, Chümoukedima nungi June 12, 2025 nü totuyuba ka agütsüba sülen iba mera ya agir.

Nisung takum lendongi aitsüsa aser nüburtem rongrongshirong adoktsüsa temulung meranga nokdaktsü ama ajitetba yong, nisung pongu

dak tema adenshiba, nok-nü mesüra lendong aketba osettsüset (lathis, kotari, nok, süng, nü, lijak) bener jajaba nokdang, ta Commissioner of Police Kevithuto Sophie, IPS ajanga metetdaktsü.

Iba tenokdangba ya anüdoklen Chathe River/Nihoto, anüolen Airport boundary, north len Ekranipathar aser south len Diphuphar (173 Battalion CRPF Camp) agi meketbanger aliba tesem nung alitsü.

Iba tenokdangba ya June 12, 2025 aonung 8:00 ako nungi jelia magienra, June 13, 2025 nikongdang 6:00 ako tashi alitsü. Anungji iba tesem nung alirtem aser iba tesemi arurtem dang eviction process sunepa aser timtem makai inyaktettsü asoshi amaliyep akatsü ayongzüker, ta sangdong ajanga ashi.

Nagaland Cabinet-i A K Mishra ajuru

Kohima, Aami/June 12 (TYO): Brehostibarnü Nagaland Cabinet-i Government of India tenüng nung Naga nung yimjung ken o jembisang A K Mishra den ajuruteba liasü aser Centre aser Naga nung telok balala tsüngta küm ter dak tema yimten ken o jembishinüa aruba nung tekeraba nung tangatettep kati arutsü asoshi state-i bendanga agütsür inyaker ta nenshia ashi.

Kohima nung Mishra den Cabinet senden amenba sülen osangbener den jembidang, State Civil Secretariat nung Chief Minister indang champer nung Mishra aser par telok den Naga

political issue indang tongmelang agi jembi dang lir, ta Minister, Tourism & Higher Education aser sorkar odongtar Temjen Imna Along-i ashi.

"Naga political issue aema cabinet-i süoki ia bilema inyaker aser Chief Minister Dr Neiphiu Rio-ia Mishra aser par telok dang Naga nung tejangraba ya akok tashi tekeraba nung tangatettep kati arudaktsünüba ya lir ta jangjangja shiogo," ta pai ashi.

Viksit Bharat 2047 nung Nagaland ya shilem ka asütsü mechi akok tashi tekeratiba nung solution ka aginer, aser ibaji ajak nükla lir ta CM-i ashi, ta Minister Along-isa ashi.

Cabinet-i ILP, ENPO, reservation commission & Assistant Professors indang jembi

Kohima, Aami/June 12 (TYO): Brehostibarnü Nagaland State Cabinet ajanga Eastern Nagaland frontier territory akhangba, Inner Line Permit (ILP) tajungtiba nung mapa kuma inyaktsü, sorkar mapa nung menden wazüka yutsüba, assistant professor 147 aser danga inyakyim atema teletmetba balala agia liasü.

Brehostibar aonung Kohima nung osangbener den jembidang, sorkar indang odongtar aser Minister, Forest, Environment & Climate Change, C L John aser Minister, Tourism and Higher Education, Temjen Imna Along nati ashiba agi, Cabinet senden ya Chief Minister's Residential Office nung amen.

Frontier Nagaland atema Eastern Nagaland People's Organisation (ENPO) comments mena jembi aser Memorandum of Settlement (MoS) nung mulungtepa aliba basic principles nung aliba ama inyaktsü pangjemshi, ta Minister John-i ashi.

Majurutepteti aliba points 12 atema maneni jembishinütsü senden nung pangjema liasü, ta pai ashi.

Iba anogo Cabinet ajanga ENPO-i akhangba nung Centre tenüng nung jembishinüsang A.K. Mishra den Chief Minister Dr. Neiphiu Rio aser Chief Secretary Dr J Alam lia ajuruteba liasü, ta Minister Along-i ashi.

"Ibai talisa ENPO indang

Frontier Nagaland Territorial Authority (FNTA) dak sendakba nung liasü," ta pai ashi.

ENPO den taoba mapang züngzüktepa aliba sülen shidak anidaktsü aser tanüngba points 12 nung tang tashi tangatettep kati maruteti aliba indang maneni jembishinü akatsü ashi, ta Along-i ashi.

ENPO ya Nagaland nung backward district trok - Tuensang, Mon, Kiphire, Longleng, Noklak aser Shamator nung aliba kin trok indang lokti tentet tulutiba lir aser parnoki 2010 küm nungi state balaka khanga arur aser iba takhangba nenshia parnoki taoba küm Lok Sabha aser Urban Local Bodies elections nung shilem magi.

Ajisüaka Ministry of Home Affairs ajanga FNTA atema benokba draft proposal ya khen atema agizük, ta ENOP ajanga December ita shia liasü.

ILP dak sendakba nung Cabinet ajanga framework ya reprangshia liasü, ta Minister John-i ashi.

ID tejangja aliba central/state sorkar mapa inyakba kibongtem dang ILP memeshitsü, Guarantor provision ya heads of public/private firms tashi alitsü, drivers, lawyers, homemaker, private sector nung inyaker densema online ILP application agütsütsü Smart Cards agütsü metenzük tashi offline ILP agütsütsü densema Dimapur nung ILP

tajungtiba nung mapa kuma amshitsü sentong tejangja Cabinet-i agizükogo, ta pai ashi.

Higher Education Department kübok Assistant Professors 147 mapa songtemtsüba dak sendakba nung Cabinet-i High-Powered Committee indang report reprangtepa liasü, ta ashi.

Department dang final approval atema tanaben magütsüdang proposal tanaben reprangshitsü aser yimya shidak amshia inyaktsü totuyuba agütsü, ta sorkar indang odongtari ashi.

Cabinet nung Indradhanush Gas Grid Limited (IGGL) pipeline project indang jembi aser 140 km nüngdaka aliba nungi 107 km atema NoC agütsüogo asür tanüngba atema inyaktsü jembi, ta Minister John-i ashi.

Kin tulu pongu - Ao, Angami, Lotha, Rengma aser Sema - ajanga policy reprangshitsü atema Reservation Policy Commission ka tentettsü akhangba Cabinet-i agizükogo, ta Minister Along-i ashi.

State Reservation Policy reprangshitsü atema züngsem pongu agi akumba independent Commission ka tentettsü Cabinet-i mulungogo aser iba commission nung IAS officer ana alitsü, Central Nagaland Tribes Council, Tenyimi People's Organisation aser ENPO nungi teshimtet nübu alitsü. Sorkari terms aser composition it aka tsüngta renemtsü, ta Minister Along-i ashi.

Dimapur Airport ulushitsü asoshi sorkari mera agir

Dimapur, Aami/June 12 (TYO): High Court ajanga Eviction orders agüja aliba ama Dimapur Airport nung sorkari ali alia aliba nung ozüng alema arua aliba aridokba maparen state sorkari inyaka liasü.

Gauhati High Court ajanga State sorkar bhukuma May 27, 2025 nü obendang agütsü aser Dimapur Airport ulushitsü atema ali alizüka aliba nungi nisung ainshidaktsüba maparen soita atatsü khen atema totuyuba agüja aliba agentsü, ta Commissioner, Nagaland ajanga sangdong ka nung ashi.

May 27, 2025 nü obendang agütsüba nungya Diphuphar Village indang Dag Nos. 38 aser 40 nung temelaba makai arua alirtem aridoktsü asoshi ketdangsür nem tashi agütsü, koba public infrastructure development asoshi agia liasü.

Dimapur Airport li temelaba makai agiba nungi iba ken o ya tenzüka liasü.

Commissioner, Nagaland ajanga osangtsüsang asüngdangyaba mapang, Atoshe

nem Ekaranipathar, Dimapur nung Dag No. 79 (97) atema ali allotment agütsüba jangjatet. Ajisüaka pai ashikülaka Dag No. 97 ta inok aser iba temelenshi bhukumtsüsa official records kecha mali, ta Commissioner sangdong ajanga ashi.

Ano iba allotment ya sorkar nungi jelia temelaba magie agütsü aser 'allotments of land' nokdanga aliba (vide NO. LR/2-21/88 Dated, Kohima, the 26th Oct, 1992) nung aibelenba ka liasü. Land Revenue Department, Government of Nagaland ajanga Dag No. 97 Ekaranipathar, Dimapur nung Atoshe nem ali lemzüksüba record mali ta jangjatsü (vide letter No. LR/7-44/DA/2008, dated 29-11-19), ya ashi.

Iba sülen Commissioner, Nagaland ajanga Assam Land and Revenue Regulation, 1886 indang Rule 26 amshia November 30, 2019 nung Atoshe indang allotment agentsü.

Ajisür Commissioner, Nagaland ajanga Deputy

Commissioner, Dimapur dang Diphuphar Village kübok Dag Nos. 38 aser 40 nung ozüng alema ali amokbanga aliba nisung 22 meindoktsü totuyuba agütsü, koba State sorkari alia airport ulushitsü asoshi AAI nem taa agütsür amshidakja liasü, ta sangdong ajanga ashi.

Item nisung 22-i airport li nung kibur akumba bhukumtsüsa documents kecha maka, aser pamok yagi Ekaranipathar Village nung ali atema agütsüba Pattas nung ajemdaker kibur akumer.

Deputy Commissioner, Dimapur ajanga December 5, 2019 nung item nisung 22 indang Pattas ya agentsü, koba Atoshe indang agienja aliba allotment nung ajemdaker liasü. Iba sülen ken o jembidaki arutsü jaokaka item nisungtemi züpazüyima yutsüba sülen Nagaland Eviction of Persons in Unauthorized Occupation of Public Land Act, 1971 nung ajemdaker December 21, 2019 nü eviction order agütsü, ta ashi.

(Maneni tapak 2 nung...)

Mokokchung nung World Day Against Child Labour mungogo



Mokokchung nung World Day Against Child Labour sentong agir kelen Mkg. DC Ajit Kumar Verma, IAS, Adv. Chubarenla aser sentong shilem agirtem noksa nung angur.

Dimapur, Aami/June 12 (TYO): World Day Against Child Labour nungdem nung DC Office Mokokchung Conference Hall nung awareness sentong ka ayongzüka agiogo. Iba sentong ya "Progress is clear, but there's more to do: Let's speed up efforts!" omen nung ajemdaker agi, kong ketdangsürtem, legal expert tem aser labour inspector tem adenshia child labour anema tang rara aliba indang sensaksema liasü.

Sentong nung o jembiba mapang Deputy Commissioner Ajit Kumar Verma, IAS-i, child labour samatsütsü atema inyakyimtem tali benoka

inyaktsü nungdakba lemsatepa liasü.

Sentong nung Panel Lawyer, Mokokchung District Legal Services Authority Adv. Chubarenla shisalen sayur liasü aser lai child labour dak sendakba nung legal framework tem aser tetsükdaktsü ajangshibatem indang lemsatepa liasü.

Shisalen sayuri ashiba agi, sensak tia ajanga child labour ya tenzükdaktsür, koba Nagaland nung yimya agi kidang yariteper ama tenzüker. Laisa, tanurtem child labour nungi kümzüksü atema sorkar scheme tem aser temzüng ozüng dak sendakba nung jenjang tapet agitsü koda

tongtibang iba indang lemsatepa liasü. Ojembirisa, inyakyim tejakleni odar saka tanurtem nem education agütsütsü atema jenjang takaratiba nung agitsü nungdakba lemsatepogo.

Iba sentong ya Senior Labour Inspector Talitemjen lenisüba nung agi aser DCP Mokokchung Samuel Kapu-i tepela o jembir tembanga liasü.

Iba sentong ya child labour indang ken o dak sendakba nung tangazükba agütsütsü aser iba ya nokdangtsü atema ajak longjemer inyaktsü koda tongtibang iba indang tangazükba agütsütsü nükjidong nung ayongzüka agiogo.

Labour Dept.-i ayongzüka World Day Against Child Labour amung



Central Plaza, Kohima nung June 12 nü World Day Against Child Labour anogomung amungba mapang DC Kohima, B. Henok Buchem, SP Kohima, Teisovise Metha, aser tangartem tenangzüktepba agiba noksa nung angur.

Dimapur, Aami/June 12 (TYO): Labour Department aser District Task Force Kohima na longjemer June 12 nü Central Plaza, Kohima nung World Day Against Child Labour anogomung mungogo.

Sentong ya Kohima Deputy Commissioner B. Henok Buchem, NCS-i maotsü. O jembiba mapang DC-i, jenjang tapet agitsü atema district administration, police, aser enforcement agency tem ajak renema lir, ta shia ajak dang kümküa alitsü ayongzüka liasü.

Paisa, tanurtem aser tetsürtem anema jenjang agiba tali küma aoba süoki ia bilemba lemsatep aser ashiba agi, iba ya taoba mapang mangashidangba ka aser Naga nung libalironung shilem ka masü. "Tia maka iba amala tatalokba ya Naga nung kidanga ataloker. Aibelena aliba ngutetertem nem tapet temerenshi agütsütsü," ta

pai tekümdangtsü metetdaktsü.

Kasa mapang nung Joint Labour Commissioner Chubayanger-i ashiba agi, Child and Adolescent Labour (Prohibition & Regulation) Act, 1986 koba tanurtem aser tinlonglongtem temeden kümzüka ayutsü atema tang linük ajunga nung benoka inyaksangshidar iba ya ajang agiba benoktsüla.

Pai ashiba agi, iba Act yagi tanur arishi küm 14 tekübok alirtem mapa inyakdaktsüba khenyongi magizüker, ajisüaka school tembangba sülen mesüra vacation mapang pei kibong inyakyim nung teyari agütsübabo menokdang, ajisüaka mapa ya lendong aketba mapa masütsüla.

Joint Labour Commissioner-isa, iba Act anema inyaksangshira tapet temerenshi agütsütsü lateta aliba indang tekümdangtsü metetdakja liasü.

Tanur anioker mapa inyakdaktsürtem ita trok nungi küm ana tashi tepuokdaki yoktsü mesüra sen 20,000 nungi 50,000 tashi senchi achitsü mesüra temerenshi anaprongla agi merenshitsü. Maneni lendong aketba mapang nung tinlonglongtem anioka mapa inyakdaktsürtema tepuokdaki yoktsü mesüra senchi sen 10,000 tashi achitsü.

Superintendent of Police, Teisovise Metha, NPS, district task force officers, colony chairmen aser tangartemi iba sentong nung shilem agia liasü. Sentong nung Assistant Labour Commissioner Nimenuo-i lokti pela agizükba o jembiba, DCPO Kohima, Sekho Dawhuo-i Child Protection Service indang metetdaktsü aser Kevi Children's Home-i ken tajung ka tena liasü. Iba sentong ya Labour Inspector Mhaletuonuo Keditsu lenisüba nung agi.

District Hospital, Dimapur nung tasü mang ana yua lir

Dimapur, Aami/June 12 (TYO): June 12 nü District Hospital Dimapur nungi Manipur nung ka tenüng agi Ngmba ta ser nisung ka asüba osang East Police Station, Dimapur nem agüja liasü. Pa ya arishi küm 32 shi asütsü aser June 10 nü District Hospital, Dimapur nung admit asü aser temang anepalua aliba mapang asü.

Osang angazükba sülen duty party mozükidangi ao aser tasü mang ya Male Ward nung bed sheet ka agi longer yua liasü. Pa adult diaper ka dang semer liasü.

Tasü mang dak sendakba nung bushisündang süogo aser temulung malemtsüsa pa temang nung tarak kecha mali aser Medical Officer-i ashiba ama pa tashidak agi asüba lir. Pa ya meshimetsür ka asütsü ta bilemer. Temzüng ozüng kübok timyaksü maparen ajak tembanga inyakba sülen tasü mang ya maitsü jangjatsü atema District Hospital

Dimapur Morgue-i benerogo.

Kasa mapang nung June 12 nüsa arishi küm 60 nungi 65 tsüngda asütsü ta temulung melemi bilemba mejangjaba nisung ka District Hospital Dimapur nung asüba osang phone ajanga agüja liasü. Iba nisungba ya June 10 nü District Hospital Dimapur nung admit asü aser temang anepalua aliba mapang asü.

Osang dak ajemdaker duty party mozükidangi ao aser asüsang ya Male Ward nung sü temerem ka agi longer yua liasü. Pa ya ki makaba meshimetsür ka asütsü ta bilemer. Tasü mang ya tang maitsü jangjatsü atema District Hospital morgue nung yua lir.

Asür kinunger aser medemertem dang Officer-in-Charge, East Police Station, Dimapur. (Mobile No.7085055020) den tongteprateptsü mepeshia metetdaktsüogo.

Dimapur Airport ulushitsü... (TAPAK 1 NUNGI...)

Iba evection order anema ken o mebenokaka, Gauhati High Court nungi January 8, 2020 nü interim order ka agütsüba yong maparen songtemtsüsa akum. Petitioners temi parnok indang writ petition nung evection order ajanga parnok mejashir saka Atoshe indang allotment songtemtsüba aser iba sülen nisung 22 indang Pattas songtemtsüba agientsü asüngdanga liasü.

Advocate General, Nagaland ajanga interim order tera melenshitsüta December 4, 2020 nü Gauhati High Court-i petitioners temi Ekaraniopathar nung aliba Dag No. 79/97 kübok ali nung kibur kumtetsü saka Diphuphar Village nung aliba Dag Nos. 38 aser 40 masü, ta jangjashija liasü.

Iba sülen writ petition ya petitioners temi withdraw süa liasü.

High Court ajanga obendang agüja December 4, 2020 nung totuyuba agütsüba sülen Deputy Commissioner, Dimapur ajanga December 11, 2020 nü nisung 22 dang Diphuphar Village indang Dag Nos. 38 aser 40 nung aliba ali ya anogo trok tsüngta azüngtsütsü totuyuba agüja liasü. Ajisüaka parnok rongnung nisung 13-i iba totuyuba ya Civil Court, Senior Division, Dimapur nung benok aser yangji soita atatsü mela, aser ano appeals benok saka magizük. State sorkari Gauhati High Court, Kohima Bench (CRP No. 104 of 2024) matsüngdang Civil Revision benoka liasü, ta Commissioner, Nagaland ajanga ashi.

Ano Atoshe yagi Diphuphar Village nung aliba Dag Nos. 40/100 aser 117 indang ali ya pa meyong ta kibur kuma civil suit (Civil Suit No. 22/19) benok aser status quo atema interim application agütsü. Ibaji anema State sorkaria Civil Revision benoka liasü.

Gauhati High Court,

Principal Bench ajanga May 27, 2025 nü Atoshe ken o nung obendang agütsüba nung temporary injunctions aser CRP No. 105 of 2024 ya meyiptsü aser airport ulushiba amala infrastructure projects atema agiba ali nung injunctions magütsütetsü ta ashi.

Ani Dag No. A/40 atema land patta ya 2005 küm songtemtsür aser Atoshe-i kibur akumba ya ozüng agi memelaba lir ta obendang agütsü nung pa ya dangar kimung nung temelaba makai tetsüng ajemoker (trespasser) ka akum aser iba yongji equitable relief atema metemsü akum.

Court ajangasa Atoshe-i material facts samatsüba indang ashi, kechiaser 2005 nung pa indang land patta agientsüba indang pai mesayutet.

Iba mesük evicted person 13 dak sendakba CRP No. 104 of 2024 atema High Court ajanga airport ulushitsü atema agiba ali asoshi injunctions magütsütetsü ta nenshia ashi aser Dag numbers nung metokmeperi aliba indanga jangjatsü, aser respondent indang ali ya Ekaraniopathar nung lir, saka temelaba makai amokbanga aliba li ya Diphuphar nung liasü.

Petitioner temi taoba writ petitions nunga parnok li ya Dag Nos. 38 aser 40 masü saka Ekaraniopathar nung lir ta nangzüka liasü.

Gauhati High Court-i iba obendang agütsüba ajanga Commissioner, Nagaland aser Deputy Commissioner, Dimapur ajanga mera shidak agiogo ta jangjatsür aser State sorkari public development projects atema nungdakba ali tanaben agitsü tashi agütsüshir.

Anungji Dimapur Airport ulushiba nung tetsükdaktsü malitsü mechi State sorkari evection drive inyak, ta Commissioner, Nagaland ajangasa ashi.

ALI AYOKER

Indisen, Dimapur nung ali tayoktsü lir : 160 ft x 40 ft
Tagineri yangi tongtepratep südaktsüner : # 6909718060



June 12, 2025 nü France nung External Affairs Minister S. Jaishankar aser France Tir, Emmanuel Macron na senden amendang tangokba noksa nung angur.

India-Canada tesendaktep yanglutsü atema maongka angutsü: MEA

New Delhi, Aami/June 12 (Agencies): Brihostibarnü Ministry of External Affairs (MEA) otongdar, Randhir Jaiswal-i, Ato kilonser Narendra Modi aser Canada Ato kilonser Mark Carney na ajurua senden amenba ajanga linük ana tsüngda tesendaktep yanglushitsü atema maongka angutsü, ta metetdaksü.

Lenir ana ajurutebpa ajanga akhümtsübutep nung ajemdaker tesendaktep yanglushitsü, külem onüktem nung o lemteptsü, tebilemtsü onüktem lemsateptsü aser linük ana tsüngda tongti onüktem aser international onüktem nung tebilemba lemsateptsü atema maongka angutsü, ta MEA otongdarisa metetdaksü.

Jaiswal-i, Canada nung ayongzükba G7 senden nung

adentsü atema Carney-i Ato kilonser Modi jaokogo, iba nungji ajemdaker pai Canada semdangtsü, ta metetdaksü.

"Taoba hopta Canada Ato kilonseri phone ajanga Ato kilonser Modi jaokba asenoki meteta lir. Phone ajanga jembidang Ato kilonser Carney-i G7 nung adentsü atema Ato kilonser jaok. Tejaokbaji agizükogo. Ato kilonser anati India atema jembitsü mesüra India-Canada tsüngda tesendaktep tejakleni aotsü atema jembishinütsü," ta pai metetdaksü.

"Canada kübok Kananaskis nung G7 senden aliba mapang nung lenir anati linük ana dak sendakba onüktem aser International onüktem nung o lemteptsü atema maongka angutsü. Onük kar nungbo

asenoki tebilemba yimjak nung lemsatepogo," ta pai metetdaksü.

G7 lenirtem senden ya June 15 nungi June 17 tashi Alberta kübok Kananaskis nung ayongzükba akatsü.

Küm shia G7 Summit senden ayongzükba lenirtemi onük balala nung o lemteper. G7 nung züngsem linüktemji United States, United Kingdom, France, Germany, Japan, Italy, Canada aser European Union (EU) lir.

Taoba mapang Canada Ato kilonser, Justin Trudeau-i 2023 küm Canada nung Khalistani kiralongrar Hardeep Singh Nijjar kasetba atema India sorkar nem tai tongloksüba sülen nungi linük ana tesendaktep kanga mejungi aküm.

Telangana nung tsüngi lendong nung aluyimer 6 asü aser 5 yiru

New Delhi, June 12 (Agencies): Telangana kübok Adilabad district nung tsüngi lendong tatalokba balala asem nung nung tetsür pezü densema aluyimer trok asü aser pongu yiruogo, ta ketdangsertemi metetdaksü. .

Telangana tesem aika nung ajungbena tzunglu sashia aru aser Adilabad district kübok tesem asem nung tsüngi lendong nung aluyimertem asü.

Mezüngbuba tatalokbaji anepdang Bela yimdak tetsür

ana alu nung mapa teinyakdak mapang tsüngi agi tenaprong aiseta asü.

Mapang tatsüka dang lir kasa district kübok Pipri yimdak tsüngi lendong nung tetsür ana densema nisung pezü asü aser ana mejungi yiru.

Nikongdang Kummari Tanda yimdak nunga tsüngi lendong nung nisung asem yiru.


Tsüngi lendong nung yirur nisung pongupronglaji Adilabad nung aliba RIMS Hospital-i anir ao. Par pongu nungjagi anabo

kanga mejungi lir.

Tsüngi lendong nung asürtem aser yirurtemji teimbaka aluyimertem aser alu nung aayangertem liasü.

District ketdangsertemi item tatalokba bushisüngdang tenzükogo aser takoksa anguba kibongtem nem teyari agütsütsü.

Tzungluruwa mongpu mapang nung state aika nung tsüngi lendong nung nisung kanga asür. Talisa alu nung tejenokdak malirtem tsüngi lendong nung asür.



New Delhi, June 12, 2025: Taküm May ita nung Mount Everest tenem kolaki atur NCC purtem Brihostibarnü Defence Minister, Rajnath Singh-i ajurudang tangokba noksa nung angur.

2029 küm nungi Women's Reservation mapaküma benoktsü

New Delhi, Aami/June 12 (Agencies): Lok Sabha aser state legislative assemblies nung tetsürtem nem menden 33 shiteta yutsüba maparen ya 2029 küm nungi mapa küma benoktsü, ta osang ka ajanga metetdaksü.

India nung census agiba maparen tembangba aser delimitation exercise agiba sülen Parliament aser state assemblies nung tetsürtem nem menden shilem 33 lemsüktsüba maparen ya mapa küma inyaktsü.

Nari Shakti Vandan Adhiniyam (Women's Reservation Bill) ya 2023 küm Parliament nung agizüka liasü. Iba ozüng kübok Lok Sabha aser state Assemblies nung menden shilem ka (1/3rd) tetsürtem nem lemsüktsütsü.


Ajisüaka iba ozüng kübok delimitation exercise tasen agiba sülen ang iba ya mapa küma benoktsü.

Hopta ka shi tejaklen Centre sorkari, 2027 küm March 1 tashi nung census agitsü, iba sülen delimitation exercise agitsü, ta metetdaksüogo.

"Census agitsü sangdongogo, iba sülen tanga inyakyim-a tenzüktsü. Women's reservation bill ya delimitation inyakyim den sendaktepa lir. Taruba election (2029 Lok Sabha election) nungi iba ya mapa küma inyaktsü tebilemba lir," ta sorkari metetdaksü.

Women's reservation ji 2029 Lok Sabha elections nung mapa küma benoktsü süra delimitation exercise ji Election Commission-i Lok Sabha election agitsü atema anogotem mesangdongdangsa renemtsüla.

Tayimtsü tsükokba lendong nung taoba Gujarat CM, Rupani asü



New Delhi, June 12 (Agencies): Brihostibar nikongdang Ahmedabad nungi London-i apusoba Air India tayimtsü ka Ahmedabad airport nungi apusoba sülen minute 5 tsüngda tsükokba lendong nung taoba mapang Gujarat Chief Minister, Vijay Rupani-a densema süogo.

Union Minister, C R Patil-i, tayimtsü nungji taoba mapang Gujarat Chief Minister Vijay Rupani-a liasü aser iba lendong nungjagi pa mekümzük, ta metetdaksü.

Air India tayimtsü nungji nisung 242 liasü (passenger 230, pilot ana aser cabin crew 10).

Iba lendong nungjagi nisung ka dang kümzük. Iba lendong nungi kümzüksang arrshi küm 38 Ramesh Vishwaskumar Bucharvada ji ajichilen emergency exit sülen seat 11A nung mena liasü. Iba lendong atalokba sülen Ramesh pasasa ambulance ka bushia oa amen.

Directorate General of Civil Aviation (DGCA)-i, tayimtsüji nisung aliba tesem- Meghani Nagar kiyong nung tsükok, ta metetdaksü.

Pilot anaji Captain Sumeet Sabharwal aser First Officer Clive Kunder na liasü.

BJP lenir, Vijay Rupani ya 2016 küm nungi 2021 küm September ita tashi Gujarat Chief Minister liasü. Pa Gujarat unit BJP nung Tir mapang tatsüka inyak aser tang Punjab & Chandigarh in-charge teinyakdak liasü.

Air India AI171 ji Brihostibar nikongdang 1:38 ako nung Ahmedabad nungi apusoba liasü. Tayimtsü nungji nisung 242 liasü aser parnok rongnung India nung 169, British nung 53, Canada nung ka aser Portugal nung tenet liasü.

Iba lendong atalokba sülen Ato kilonser Narendra Modi-i Union Home Minister Amit Shah aser Civil Aviation Minister Ram Mohan Naidu na den tongtepratepa osang metetpelaba den külemi akoba tashi yariteptsü tuyua liasü.

Ato kilonser Modi den jembiba sülen Amit Shah aser Ram Mohan Naidu naprongla Gujarat-i apusoba ao.

Iba lendong osang angashia linük Tir Draupadi Murmu, Lok Sabha nung opposition lenir Rahul Gandhi aser Foreign Minister S Jaishankar nung densema yimtenren lenirtem aikati mangyim tejashi lemsatepogo.



TIR YIMYIM YIMOBILEM (EDITORIAL)

DIMAPUR FRIDAY, MAY (AAMI) 13, 2025

Ali magütsütetba takoksa !

Nagaland ya alinük tajung aser tzü moponga tajung saka nisung majung , iba jagi Nagaland tenemtsüng lenden nungi tenzüker topur tajung arem aser ayongnutem agi sünga aliba tenem tekong tashi nung tenüngsang aser naklo ken atentsü melen mangyim ken ama tejashi aser tesasaba kensü ola dang angashir. Aji oda, asenok nisung makümdang tangar tashitemeteteremi yanglua toktsüba Dimapur Railway station-a ulushia tajungtiba küma yanglushitsü melen asenoki railway pur li atsünga agiadokba tesemtema meyipa magütsütetba ajanga tang jajaya aliba Lumding aser Furkating na tsünga Dimapur railway station aliba ya meküntoker train lenmang ulushia yanglutsüa akok ta Northeast Frontier Railway (NFR) nung tongti ketdangsertemi ashiba o ji zübazülema agitsüba o ka masü. Tanü alima nung nisungtem senzusenpongtsü aser khu belenshitsü asoshi ali aser tzü nung dang masü saka mopong nung dena senzür aser khu tulua dena abener, ajisüaka nisungtema train nungsa teimba senzür aser khua train nungsa teimba abener. Aji oda, alima nung ya train mali nungbo gari aser tayimtsü kisüng nungbo nisungtem mapa matemtsü aser nüngdak agia meperitsü aser ano asenok senzusenpongba , khu abenba taa, chiyongtsü, abensüoshi aser nüngdak osettem ajak jenjang tasakba akümtsü, iba jagi garia aser tayimtsüa aser tzüim nung jajaba rong tulutema liaka, tanü tashi alima ajaklen train jajatsüba nungang temulung tagütsüba agüja inyaker. Aji oda, India nunga asenok Noretheast state-tem shia yimtiba tashibo tayimtsü agidang masü saka train agia atongtsüsa inyaksü center sorkar sentong lir. Ibayongji, yashi asenoki iba yimobilem nung lemsatepba ama Assam nung dang masü saka joko Agartala, Itanagar aser Aizawl yimtitembo train lenmang agi tongogo. Ajisüaka, asenokbo nübortem asoshi pei li angati tenla agütsütsü melen nübortem nüngdak nung amshitsü asoshi government—i mekazüka ayuba ali dena rakzüka agir aser iba jagi nübortem asoshi terenlok mapa inyaka moutet akoksar. Atangji, aji ali rakzürtemji masü saka government tashimaitba ajanga lir. Aji oda, Nagaland nungbo National Highway dena atsünga agiyonga government-i kecha meshiteter, iba jagi railway station aser tayimtsü anendak airport dena kibur maliba oset amai kümdaktsür. Tanga Dimapur railway station-i odangra, train station-i aoba lenmangbo ayong amai kümer angutsü. Ibaji ajanga anogo shia bendanglen nungi train nung bendangertem meyerijang dak tali arur. Asenokbo teliba, tenguba aser tesenzüba asünungji, asenokibo kecha balaka bilema malitsüa akok saka train aser tayimtsü nung arur asen lima nung tetsüng ajemok dang, asen limaji janaona agi sünger, tao majung meshimetsür ajurur aser lenmangbo ayong amai kümer lira, iba jagi asenok jakla aser mulungsentsü sayur. Asenoki airport aser train station nung tangar bendanglen nungi arurtem agizük dang narolang tajung agüja agizüktsüa akok saka tangar mulungjangbo narolang jagi masü, asenok yimti yimdong merükba aser terenlok mapatem shitak inyakteta akaba mapatem agi dang akoktsü. Aji oda, India asoshi dang masü saka alima kintem ajak asoshi Nagaland ya kanga tongtibang tesem ka lir, kechiyong asen lima ajanga India, Myanmar aser China limatem dang masü saka alima kintem aika oli aruli jajatsü, idangji shishilembaba mapa renloktsü aser tashitemetet züintsü aser Naga nungertema pi bendangertem den tesentaktep tajung yangluba agi shisa renloka taküm libaliro tajungba akümtsü. Iba ama lima ka nung train station tulu nüngdaker aser tayimtsü anendaka India len nungi dang masü saka tanga bendang limatem nungia dena arutsüsa International Airport küma yanglutsüla. Atangji, item nüngdaktemji asenok Nagaland nung alir Naga nungertem dang nungibo Aiport Authority of India aser Northeast Frontier Railway-i tajungba meteta lir, ajisüaka asenoki ali magütsüteter. Atangji, nisung aika asoshi nübortem atema terenlok mapa inyaksü asoshi asüyonga pei li angati agütsütsübaaji tasak asütsü, anungji jenjang tajemba agi agütsütetra, ibaji pei lima asoshi tenla agüsür asütsü. Kasaji, asenokia government li tim mesüika atsünga agia lira, iba lijibo mulungsua nübortem asoshi tenla agütsütsü tim. Iba ama tangatetba tenla jagi dang Nagaland —a tangar lima mesüka topur junga aientsü.

OLEMSABANG

Oyster mushroom (konger) dak sendakba metettsüym

~ Dr. Sosang Longkümer.

Oyster mushroom (konger) chir asenok Naga nunger aser talisa asenok Aor asüba otsü nung sendakba nung meteta alitsü tongtipang onük kar :

- * Oyster mushroom ta asüba konger yabo miim masü, kechiaser iba ya Government, Ministry of Agriculture aser Food and Agriculture organisations alima ajak nung ya tachila ta approved sür tsünüa arur.
- * Konger ya kechiba majung akümer ta süra, konger peter mapang talangka lir mesüra tera shirema aoba, tera tanüla küma aoba tem achinungbo temang atema majung asür. Kechiaser asenok yangi, talisa Assam nung adokdaktsüba nung parnoki chemical tesashi amshia, pa adokdaktsütsü oset sterilize asür aser iba konger apong dangi item mozüji konger nung alir. Anungji itemji temang atema majung. Talisa mushroom ya cold chain nung amshitsüba sernung asenoki anepalu masür, anungji yakta raksatoker. Anungji menur, anogo ka süyia mesüra ghonda 9-10 sülenbo refrigerate süa ayu mesüra kanga junga repranger achitsüla.
- * Asenoki talisa asen Naga nungeri tsünütetba konger tem (Local Product) alia achitsüla, kechiaser Nagaland nungbo chemical maliba konger dang amshidaktsür, aji Horticulture Department-i anir Nagaland State Rural Livelihood Mission nung konger tsünür tem ajaki, chemical maliba konger adokdaktsür. Itemjibo temang atema tajung aser medicinal value kanga lir. Saka asenoki jenjang talangba bushia Assam nung adokba konger bushia alia achir. Assam nungeri konger kangabo machir, saka asenok Naga nunger dang ayoktsü mechi farm nung jenti adokdaktsür. Aser konger aika adokdaktsütsü mechi parnoki mozü aser chemical balala amshia adokdaktsür. Iba yongji temang nung mapet akümer, anungji itemji kümdangtsüla.
- * Konger ya kanga kera raksaba chiyongtsü ka lir. Anungji mapang talangka lirbo kongrepa aor mesüra tanüla kümatoker. Anungji itemjibo machitsüla. Itemji kanga junga repranger alitsüla. Tezükнем tesashi menemba metettsüla aser nai kümzüka yuti süra refrigerator mesüra deep freezer nung jungjunga ayutsüla aser itemjibo anogo aika sülena meraksai alitsü aser achitsü akok.

Oyster Mushroom Shelf Life:

Asenoki tsünüba oyster mushroom indang shelf life:-

1. At normal temperature 1 to 2 days.
2. In refrigeration temperature: 1 week tatakzük lir. Iba sülenbo nisung achitsü majung akümer aser gastrointestinal distress adoktsü akok.

Sentsü melenba mesüra anüla akümba oyster mushroom indoktsüla.

Tekümdangtsü:

- * Teti oyster mushroom ya tejangja sources nungi alitsüla.
- * Konger machidang teraksa ali-mali reprangtsüla.

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Seoul nung Asian Evangelical Leadership Forum senden tenzükogo



June 11, 2025 nü South Korea yimtiba, Seoul nung Asia Evangelical Leadership Forum (AELF) tetenzük sentong nung Asia Evangelical Alliance General Secretary, Dr. Bambang Budijanto-i okila jembidang tangokba noksa nung angur.

Seoul, June 12, 2025 (Agencies): June 11, 2025 nü South Korea yimtiba, Seoul nung Asia Evangelical Leadership Forum (AELF) senden tenzükogo.

Alima tensa mapang kanga kera melenshiba mapang nung asentenshir nütsüngsüba mapa inyaksü nükjidong nung iba senden ayongzüka akar.

Asia Evangelical Alliance (AEA)-i ayongzüka anogo asemnü senden nung Asia nung aliba linük 20 dak tema nungi Evangelical lenir 100 shi adener. Anogo asemnü senden ya "Disciple or Die 2.0" omen nung ajemdaker agir.

Antioch Center nung iba senden tetenzük sentong nung Asia Evangelical Alliance General Secretary, Dr. Bambang Budijanto-i okila jembia liasü.

Pai tesüiba küm trok tsüngda asalentong yanglur inyakba mapatong balala ajanga evangelical alliance indang mission mangdang melenshiba metetdaksü.

Dr. Bambang Budijanto-i, "Iba ya senden ka dang masü saka mapa inyaksü atema adenshiba lir. Nükjidong ka yur Tsüngremi nisung shia yagi anir aruogo. Na ya repranga atar ka dang masü saka tarutsü nung teinyaksü mapatem atema telemtetba agiba nung shilem agir ka lir," ta ashi.

AELF-i Asia nung Kibubai tenyaba wadang ataloktsütsü, talisa nütsüngsüba mapa inyaksü atema asalentong aika renemtsü nükjidong nung iba senden ayongzü.

Budijanto-i, "Taonung asenoki 'Nü sentsüwangshi sayuang' ta sarasadema iba senden tenzüker. Iba ya ministry senden ka dang masü saka asentenshir inyaksü atema yongyaba sentong ka lir. Asen taküm aser Arogotem nung Tsüngrem sentsüwangshi angutsü asenoki yongyar," ta ashi.

2019 küm World Evangelical Alliance (WEA) General Assembly mapang nung Asia nungi Evangelical lenirtem dang mapatong renemtsü aser sarasadem ajanga Tsüngremi melungba jangjatsü atema tayongzüka agüja liasü.

Budijanto-i, "Kechi atalok, Tanela Temeshi ajanga Yisu Khristai 'Kintem ajak nütsüng kümdakjang' ta ashiba ajanga asenok ajungmeso. Iba movement ajanga 2020 küm nungi tenzükba küm tersüji (decade) 'Decade of Discipleship' asütsü asenoki lemtet," ta ashi.

2020 küm coronavirus wara mapang online ajanga AEA mezüngbuba General Assembly "Church in the New Landscape" omen nung agia liasü.

Budijanto-isa, "Taoba Aso nung asenoki Arogo aser mission mapa inyakba inyakyimji tan Aso mapang nung meinyaktetsü, anungji inyakyim melenshitsü nüngdak," ta ashi.

2024 küm Mongolia nung AEA General Assembly ayongzüka liasü, aser iba mapang nungji strategic task forces tenet aliba nungi pezü dang aküm.

Budijanto-i, "Kibubai tenyaba wadang tekeraba nung inyaksü atema asenoki lenmang ajak bushitsü lemteta liasü," ta ashi.

Budijanto-i, "William Carey nungeri tenzükba Christian mission movements ya tatembanglen kati arur asütsüa akok. Tsüngküm-mongpu melenshiba ama Tsüngremi movements tasen yanglutsür. Ajisüaka asenoki tesülen meyipa meprangdangibo tejaklen rangloktsü makok. Tejen inyakyimtem joko mebenshitsüla saka Tsüngremi lenmang tasen lapoktsüba nung jaja tenzüksüla," ta ashi.

Asia Evangelical Leadership Forum (AELF) senden ya anogo shia sarasadem onük balala nung ajemdaker agir. Mezüng anogo nung nung sarasadem omenji "Kü dang Nü sentsüwangshi sayuang" (Anitet 33:18) liasü. June 12 nü sarasadem omenji "Kü dang Nü lenmang sayuang" (Anitet 33:13) liasü aser June 13 nü sarasadem omenji "Kü dang Nü teka sayuang" (Anitet 33:16) asütsü.

Anogo asemnü senden nung mission wadang ainba, temelenshi adokba aser nütsüngsüba kulitem lemsateptsü.

Senden tatembangbuba anogo nung Asia evangelical lenirtemi maneni taruba küm 10 tsüngda nükjidong yur longjemer Kibuba wadang inyaksü atema bangjemtsü.

Budijanto-i, "Iba ya AEA atema asalentong ka dangbo masü saka asenok longjemer külemi jajatsü lenmang ka lir. Asenok jakdang aliba wadangji kija inyaksüsabo masü," ta ashi.

AELF 2025 nükjidongji Asia tesem ajaklen nütsüngsüba mapa inyaksü atema taruba küm 10 asoshi mangdang yur lenirtem longjemer inyaksü atema lir.

Budijanto-i pa onük tembanga lenirtem dang longjemer inyaksü ayongzü.

"Asenoki iba sentong ya yimya ka ama magitsüla saka temeshi mapang ka ama agitsüla. Tsüngremi asenoki imdangjemba dang nungi tali asenok nem inyakdaksüner. Ajisüaka asenoki teka aser temelungjang ajak agi melungsoa longjemer inyaksüla," ta pai ayongzü.

Asia Evangelical Leadership Forum ya Hokolbar (June 13) nikongdang tembangtsü aser tatembangbuba sarasadem omenji "Nü taküm onok dang sayuang" asütsü.

ANOGO ABEN TSÜNGREM DEN

Shisatsü metentsür

SAKA SHISATSÜJI LAR CHIRTEM AJAKI
METENTSÜR LUKE 7:35

Alimaji techirartetmi sünga lir. Ajaklen parnok tebilemba shisatsü agi na mesüksü merangertem lir. Saka Tsüngremi ashir, shiri pei tebilemba tashi ayimoktsür pa/la ji shisa takatiba masü, saka shibai mapang nung tim telemtetba agir pa/laji shisa takatiba.

O langtepba mesüra toktepba ajanga shisatsü kuliji magütsür. Mapang nung dang shisatsüji sayur. Kari tekong meranga parnok tebilembaji tajungtiba ta sangdonger. Shirnoki parnok tebilembajisa tajungtiba akhanger aji mezüngshi parnok shisatsü bendanger tajungtibaji mapang lir. Ola tulu agi ayimtenba jagi masü mapang jagi shisatsüji kuli asür.

Kodang Tsüngremi ne dang langka inyaksü ashir karibo ne shisatsü aser mapaji magizükteti anema apusotsü. Idangji ne telangzübaji ne sasa temeten ashitsü bilemtsü akok. Aji saka, nai aremzüka atara ne mapa nai metenja jembiba dang nungi tajungba mapang nung ne shisatsü jungkai adoktsü.

Putu ajak nung, Tsüngrem nungi anguba shisatsü tindang aser shidak ta kuli süa aru. Nai angashiba ajak Tsüngrem O anema bendangtsübaji lendong lir. Tesayuba balala adoktsü aser süitema aotsü saka Tsüngrem O tatem makai alitsü. Kodangsa nai kar nem tsüngi o agütsüdir, ne tebilemba tajungtiba nungi masü, Tsüngrem O nungi tejangja metetta agüjang. Nai Tsüngremi mulungba shimteta ali tashi, mapangji ne pukümer alitsü. Mapang nungji nai ne tai putetra, Tsüngrem dang tatok meshir Laishiba ajanga Tsüngrem nungi o tasen bushiang. Iba o nung tashi angang aser ne taküm nung Tsüngremi Pa shisatsü aka jangjashidaktsüba ajia liang.

China nung Zion Church kübok aliba Arogotem maneni shibangtsür

June 12, 2025: 2018 küm asem shibangtsü aser China nung Communist sorkar ketdangsertemi Arogo tuluka Guiyang densema tesem aika nung Arogotem mita ao.

Indang Tenla kitem shibangja liasü, ajisüaka Arogo züngsemtemi asentenshir Tenla kitem lapoka tekülem agir.

Tesüiba hopta ishika tsüngda sorkar ketdangsertemi iba Arogo Tenla kitem mita oa Khristan aika apu aser tanaben Tenla kitem shibangtsür, ta Khristan melungtet telok Bitter Winter-i metetdaksü.

Security ketdangsertemi June 1 nü Guizhou province kübok Guiyang nung aliba Beijing Zion Church branch mita ao aser Tenla kidang alirtem ajak apu.

Iba Arogo nung putir Yao Yong aser Mao Yue naprongla anogo 15 pua ayutsü obendang agütsü, ta Bitter Winter-i metetdaksü.

Jiaxing, Zhejiang Province nunga June 3 nü police-i Beijing Zion Arogo nung inyakertem ki mita ao aser May 30 nü Anhui Province nung ketdangsertemi Hefei Zion Arogo nung pastor Gao Le apu aser anogo pongu sülen ang chiok.

"Ketdangsertemi Arogo nung züngsemtem ki mita aoer aser parnok ket nung aliba Laishiba densema kaket aika apur," ta Bitter Winter-i metetdaksü.

Chongqing yimti nunga ketdangsertemi Zion Arogo

asem shibangtsü aser Hangzhou, Ningbo aser Guiyang densema tesem aika nung Arogotem mita ao.

"Linük tesem ajaklen Zion Arogo Tenla kitem shibangtsütsü nükjidong nung police campaign ka tenzükogo. Beijing Zion Church ya yimti nung aliba house church tulutiba liasü. 2018 küm ketdangsertemi iba Arogo mita aoba sülen shibangtsü, ajisüaka züngsemtem maneni adenshia tekülem sentong agir. Ketdangsertemi mapang shia tamangertem apur aser amokmerener, ibayongji züngsemtemi mapang shia tesem melenshia tekülem sentong agir," ta Bitter Winter-i metetdaksü.

Yimti aser province aika nung Beijing Zion Church indang branch aika lapokogo. Zion Church ya mezüng 2007 küm lapoka liasü.

"Police-i Khristantem ki aser parnok mapa inyakba tesem mita oa parnoki joko Zion Church nung shilem magitsü, ta nangzükdakja sign südaksür," ta Bitter Winter-isa metetdaksü.

Tang alima nung Khristantem alitsü atema linük tamajungtiba 50 rongnung China ya jenjang 15buba nung lir (Open Doors' 2025 World Watch List).

AO OSHI ANGAZÜKDAK:**TANÜ ANGAZÜKTSÜBA OJANG****Tenüksürem**

(v) tenük tilaba küma lapoker reprangba (slanting eyes)

* Anü kanga sashia apuba agi tenüksüremer jaja.

Tenüng

(n) nisung shia bendangteta ajaba (name)

* Asenok ajak tenüng kotak nung ajatsü ta ashir.



Tir Yimyim

OLONG PAITEP # 7180

1				2				3		4
5		6								
							7			
8										
										9
		10				11				
				12				13		
14										
						15				
16										

TIPLÉN

2. Auonungchiyongtsüasenba

-(7)

5. Mangyimba mapang

-(5)

7. O tamendakdak

-(4)

8. Peidak malangba

-(7)

10. Juli

-(7)

12. Sen ayudak

-(7)

14. Tenük agi ajitet

-(4)

15. Tamajung aküm

-(5)

16. Apuso

-(7)

LANGTSÜNGLEN

1. Lenmang

-(7)

2. Aor kidong ka tenüng

-(6)

3. Tenarong maten

-(6)

4. A ___ g

-(3)

6. Mopung apodoka

-

ola adokdaksüba

-(3)

9. Tongtipang tagitsü

-(7)

10. Menungra bilem

-(6)

11. Aiür

-(6)

13. S ___ k

-(3)

14. T ___ r

-(3)

OLONG PAITEP # 7179 TELANGZÜBA**TIPLÉN :**

1. Yiar, 3. Tesola, 7. Yimra,

8. Tangar, 9. Peria, 10. Tanur,

11. Tasen, 13. Lemjem, 15. Tambu,

16. Khuret, 17. Sang.

LANGTSÜNGLEN :

1. Yimti, 2. Amen, 4. Shiner,

5. Alaka, 6. Satan, 9. Putet,

10. Tembar, 11. Tatok, 12. Amang,

14. Jala.

NAI-A YA METETTER MA

Trent Alexander-Arnold Brehostibarnü officially Real Madrid nung adenba sangdongogo. Hopta ishika tejakdang Real Madrid-i Trent Alexander-Arnold alizükba sangdonga liasü, ajisüaka pa Brehostibarnüang officially club nung adenba sangdongogo. British nunger football asayar yagi Real Madrid president Florentino Perez matsüngdang pa indang contract nung sign süogo. Pa Iba club nungi 2031 küm tashi asayatsü. Pa nem jersey number 12 agütsüogo, koba taoba mapang nüngtugu Brazil nunger fullback Marcelo-i sema liasü.

Ozüng alema arur alirtem Assam nungi mintoktsü: CM Himanta

Assam Chief Minister Himanta Biswa Sarma

Guwahati, Aami/June 12 (Agencies): Assam Chief Minister Himanta Biswa Sarma-i Bodhbarnü ashiba agi, National Register of Citizens (NRC) nung tenüng züngoksemer liaka state-i bendangertem maneni meyipa yoktsü.

Darrang nung o jembiba mapang Sarma-i ashiba agi, NRC kija agi state nung nisung ka lisopur jenjang kuli

magütsütettsü.

Sarma-isa, NRC inyakyim ya aitsüogo aser ashiba agi, nisung aikati ochimashi inyakyim ajanga parnok tenüng züngoksemogo.

"Onoki bendangertem meyipa yoktsü atema policy tesashi ka yangluogo. Ketdangürtemi nisung kaji bendanger ta jangjara parnok NRC nung züngoksemer liaka pei linüki meyipa yoktsü," ta pai ashi.

NRC koba Supreme Court-i achaayanga 2019 küm August 31 nü sangdonga liasü, iba nungi nisung lakh 19 dak tema züngtokogo.

Ajisüaka Registrar General of India-i iba list ya officially mesangdongi lir aser iba ajanga NRC ya temzüng özüng dak ajemdaker benoka inyaksangshi mesüteti lir.

Tawa tatalokba balala dak sendakba nung Srama-i ashiba agi, security agency temi Assam

kübok tesem balala nung özüng alema arur alir asütsü ta temulung melemi bilemertem puogo.

Ketdangsürtemi item nisungtem ya aika Bangladesh-i meyipa yokogo, ajisüaka karbo kidanger linüki magizükba sülen meyipa aruogo.

"NRC nung tenüng züngoksema aliba ajanga nisung ka temzüng özüng kübok lisopur ka mekümdaktsür ta amanger," ta Srama-i ashi.

NRC inyakyim nung timtem ali asü ta asüngdangba mapang Sarma-i, ketdangsür kari nendak nendak minyak asütsü akok ta langzü.

Kasa mapang nung June 9 nü special Assembly session ka agiba mapang Sarma-i, sorkari Immigrants (Expulsion from Assam) Act, 1950 benoktsü sentong lir ta ashi, koba ajanga district commissioners tem nem özüng alema state-i arua alirtem bushiteta mintoktsü atema tashi agütsütsü.

Arunachal: SDSU-i Boleng District Hospital lapoktsü akhanger

Itanagar, Aami/June 12 (Agencies): Arunachal Pradesh nung Siang District Students' Union (SDSU)-i Boleng nung tawa yangluba District Hospital tang tashi inyaksangshi masüba atema aitsüogo.

Iba mozüki ya 2024 küm December 19 nü formally lapokogo, saka tang tashi nüburtem atema lapokja mali aser tenüngdakba medical service tem magütsür.

Arunachal Press Club nung Bodhbarnü jembiba mapang SDSU vice president (protocol) aser medical & health sector mendenbuba Karban Tamut-i, state sorkari iba facility tang tashi inyaksangshi mesüdaktsüba atema kanga tezü adangba lemsatepogo.

Paisa, iba mozüki tasenba ya

primary healthcare hub ama iba ajanga Siang district nung aliba nüburtem tenzütsü nüburtem timla lir, ta ashi.

Tamut-isa, local tem timtem kanga ajangshiba lemsatep aser ashiba agi, shirangertem temang anepalutsü atema Aalo mesüra Pasighat-i km 90 dak tema aoer.

"Tensa kanga majungba mapang nungbo mapaji ajak, saka Siang nung onokbo mozüki kishi shibanger aliba kima tokja lir aser kasa mapa nung iba dak nisung taküm ka metaloka lir," ta pai ashi.

Paisa, district nung tenüngdakba healthcare infrastructure maliba indang tuteta ashi, kong pharmacy tem inyaksangshi masüba, chemist outlets maliba aser emergency medical supplies agi kanga anüngba densema lir.

Tamut-i ashiba agi, district indang tang healthcare system yagi Indian Public Health Standards (IPHS) metongteti lir, kechiyong staff densema mozüki inyaksangshi mesüteti lir aser iba den qualified specialists mali aser tenüngdakba mozü aser taküm kümzütsü atema equipment tem amenoka mali.

SDSU-i, Boleng mozüki atema anaesthesiologist, gynaecologist, paediatrician, geriatrician, orthopaedic surgeon, aser general surgeon densema tangsa tang tenüngdakba medical specialist tem shimsü takhangba agütsüogo.

Union-isa, health department dang Rumgong nung staff agi anünga aliba Community Health Centre-i medical officer talila yoktsü mepeshia metetdaksüogo.

Assam: Nashi auya bener oya aliba gari ka rongtoktsü

Digboi, Aami/June 12 (Agencies): Brehostibar anepdang Digboi police station kübok Panbari tesem nung mini truck ka nung nashi auya bener oya aliba kümzükbä sülen nashi bena aliba gari ya rongtoktsüogo.

Iba tesem ya nashi chang auyartemi timtem agüja arudar aser iba ajanga Panbari nung aliba aluyimertem kanga mepelar.

Iba tesem nung alirtemi Panbari yimtsüng nungi auer rongnung tongtiba Tulon

Changmai pua kanga mejungi azük aser gari rongtokja liasü.

Iba sülen mapang tatsüka lir Digboi police-i Changmai kümzükbä, saka pa nem teyari agütsürtem jena oteta liasü.

Yimdaklirtemi ashiba agi, gari ya auyaba nashi chang belentsü atema amshiba atema parnoki rongtokja liasü.

Digboi police kübok yimtsüng aika nung nashi chang auyaba osang agüja aruogo, koba ajanga parnok libaliro dak kongshir. Alu alaba tialong nung nashi chang auyar aoba

ajanga tetsükdaktsü tulu adokdaksür.

Iba la mesükba tatalokba ka nung 2024 küma October ita Mayong, Morigaon district nung nüburtemi nashi chang auya-a belenshiba nung amshir asütsü ta temulung melemi bilemba gari ka rongtoktsü aser gari anisang dak züka liasü.

Item nashi changtem auyar aoba ya kidanger linük Bangladesh-i shibelener aotsü atema asütsü ta temulung melemi bilemer.

PUBLIC NOTICE

Registered Office: ICICI Bank Tower, Near Chakli Circle, Old Padra Road, Vadodara- 390007

Corporate Office: ICICI Bank Towers, Bandra-Kurla Complex Mumbai 400051

GOLD E-AUCTION DEN REPSEMA INVITATION OSANG

Teküboklen shisema aliba sen apurtem dang hon agi yangluba oset dak sendakba nung facility nem agütsütsü aliba sen aotsü metetdaksür. Parnoki ICICI Bank Limited ("ICICI Bank") nungi agiba ("Facility"). Parnoki sen maotet asünung onoki June 23, 2025 nü hon ornament tem E-Auction ka agitsü. Auction ya online nung <https://jewel-auction.procuretiger.com> nung 12:30 pm nungi 3:30 pm tashi agitsü. Osang tejangjaba agitsü atema agüja aliba website nugn login süang. Sen apur sür lira condition ajak ya legal heir tem dak kaotsü.

Loan A/C No.	Customer Name
Branch Name: Dimapur	
047662000652	Edento Achumi
047662001244	Priyanka Kumari

Loan A/C No.	Customer Name
047662001245	Gautam Mazumdar
047662001248	Meena Devi

Loan A/C No.	Customer Name
047662001249	Poonam Devi
047662001251	Md Abdul Hussain

Date : 13.06.2025
Place : DimapurS/d Authorised Officer
For ICICI Bank Limited

Israel opposition-i parliament loksatsü merangba nungi jenbu

Jerusalem, Aami/June 12 (Agencies): Israel nung tang yimsü tesüdak özüng yanglurtemi telemsa adoktsüsa 'mandatory military service' dak sendakba nung tezüngzüktep ka yangluba sülen opposition temi parliament loksatsü merangba nung Ato Kilonser Benjamin Netanyahu'er kanga saka lungjema aliba right-wing coalition jenbuogo.

Iba bill ya agizük asübo kera election agitsü asoshi mera mezüngbuba asütsü liasü, saka menden 120 aliba Knesset nung Brehostibarnep özüng yanglur 61-i magizük aser 53-i bhukuma liasü.

"Mapang talangka jembishinüba sülen draft law amendaktsü asoshi principles nung tangatettep kati aruogo," ta Knesset indang Foreign Affairs and Defense Committee Chairman Yuli Edelstein-i sangdong ka nung ashi.

Opposition temi iba conscription bill ya benok, koba religious seminary students tem army inyaktsü asoshi arishi küm dak sendakba nung Netanyahu dang jashia aliba ultra-Orthodox party tem teyari nung election agitsü

teimla liasü. "Netanyahu'er sorkar melentsü aser talisa iba miim aketba sorkar melentsü ya tangsa tenüngdakba," ta Labour indang opposition özüng yanglur Merav Michaeli-i vote agütsütsü lia ashi.

Opposition nungya tongtipangsa centrist aser left-wing telok aser Shia aser United Torah Judaism (UTJ) densema ultra-Orthodox parties temi Netanyahu sorkar yarir, aser parnoki taoba mapang motion bhukuma nokdaktsü amokmerena liasü.

Israel nung military services ya ajak atema lir, saka linük kumtetdang yangluba özüng ka kübok tebur shirnok bendanga agütsür full-time temeshi Jewish texts azünger, parnok nem de facto pass agütsür. Aser iba mapang ultra-Orthodox ya kin kanga tilaka liasü.

Iba özüng nung tatok agüja aliba agientsü merangba ya Israel-i Gaza nung tanen makai amakba mapang tesashiba akum, kechiaser mitkar temi rara daki yoktsü sepai tali ang bushir.

Netanyahu dang par Likud party nungia ultra-Orthodox

teburtem sepai nung shimoktsü aser jenshia senzür nem temerenshi agütsütsü ajungshia arur, koba Shas party-i memulunger aser par züngsemtem military services nung teti atema atoktsü özüng tejangja ka akhanger.

December 2022 nung tentetba Netanyahu'er coalition ya Israel puti otsü nung "most right wing" rongnung ka ta züngshir.

Vote agiteptsü lia, rara mapang sorkar anentsüba ajanga Israel tarutsü asoshi lendong timtem alitsü, ta far-right Finance Minister Bezalel Smotrich-i shia liasü.

"Rara mapang Israel linük nung election agitsü meranger shinga puti otsü nung tatok magütsütsü. Military nung raratsü asoshi ultra-Orthodox teburtem linük aser security ajanga nüngdaker," ta Smotrich-i ashi.

Tatem nung ultra-Orthodox özüng yanglurtem timbai parliament lapoktsü merangba nung meyaritsü mulungtep.

Tang yangji tamakok ajuruba sülen opposition temi ano bill ka benoktsü atema ita trok atatsüsa akumtsü.

Iran-i nuclear özüng sülen manidakba UN-i bushitet

Vienna, Aami/June 12 (Agencies): Iran-i alima dang nuclear kumzüka ayutsü züngzüktepba sülen manidaker ta sangdonga United Nations nuclear watchdog indang Board of Governors-i pangzüng ka agizükogo.

International Atomic Energy Agency (IAEA) indang Board of Governors ajanga Brehostibarnü agizükba pangzüng bhukuma vote 19, anema vote asem aser vote agitepba nung madener 11 liasü.

Tongtipang onük kaji Iran nung sangdonga maliba tesem tem nung uranium traces putetba atema Iran-i IAEA dang kuli tejangja agüja rasaa meshitetba ya lir.

Iran-i 2019 nungi par teinyaktsü meinyaki IAEA nem sangdonga maliba tesem balala nung nuclear material aser inyaksangshi mesangdongba atema mapang shidak nung amalitep makaba ya UN agency den pari züngzüktepba teinyaktsü meinyakba lir, ta pangzüng nung shia liasü.

Yangji langzüa Iran indang Foreign Ministry aser Atomic Energy Organization of Iran (AEOI) ajanga sangdong ka nung, linüki "secure location" nung uranium enrichment facility tasen yanglutsü aser "danga mera tem khien lir sangdongtsü, ta shia liasü.

AEOI ajanga ano X nung sangdong balaka agütsüba nung, Fordow nuclear site nung aliba first-generation centrifuges ya "advanced sixth-generation" centrifuges agi melentsü ta shia liasü, anungji parnoki nuclear enrichment mapa maneni inyaktsü ta angateter.

Board indang pangzüng ya technical aser legal tsütsü tamendak dak maka, ta foreign ministry ajanga ashi.

Menden 35 aliba board nung iba pangzüng anema vote asem agütsüba ya Russia, China aser Burkina Faso liasü.

Israel indang foreign ministry-ia international community dang pangzüng nung telangzüba tesashi agütsütsü ajungshia sangdong ka X nung agüja liasü.

Tehran-i nuclear programme renlokdaktsüba mechi United States aser Iran tsüngta senden trok buba Deobarnü amentsü, ta Oman indang Foreign Minister Badr Albusaidi-i Brehostibarnü sangdongba mapang ka nung IAEA vote ya agia liasü.

IAEA pangzüng ya ajanga tenokdangba/temerenshi agütsüra Iran ya Treaty on the Non-Proliferation of Nuclear Weapons nungi ainshitsüsa akumtsü, aser ibaji ajanga US den jembishinü tali benjatsü, ta

Iran-i UN dangi shiti ka zülüogo.

US Tir Donald Trump aser pa tembar aser Middle East envoy Steve Witkoff nati anir sorkar maparen balala nung temulung agüja inyakba rongnung nuclear tezüngzüktep tasen ka yanglutsüba ya ka lir.

Trump-i tesü tashi jembishinü nung teimla aliba lemsatepa liasü, saka Bodhbarnübo tezüngzüktep ka yanglutsü teimla kangabo mali ta shia liasü.

Israel-i Iranian nuclear facilities amaktsü akok ta takzüba mapang Trump-i Iran ket nung atomic bomb alitsü khenyongi memelatsü ta nenshia ashir.

Oman nung US-Iran nuclear ken o jembitsü lia Witkoff ajurutsü atema Israeli Strategic Affairs Minister Ron Dermer aser Mossad intelligence agency tekolak David Barnea aotsü, ta Brehostibarnü Israel nunger osang ajanga ashi.

Rara adokra region nung US military bases tem amaktsü ta Iran-i Bodhbarnü amokmerena liasü.

Osangtem ajanga ashiba agi, tang region nung tensa mejungi aliba mechi Middle East nung linük kar nungi US-i kanga nüngdak masüba staff tem anizüker ogo.

Menungra Bilemteter



Lt. T. Watimenla Jamir
Aso 16-03-1962 – Asü 13-06-2023

Temeim oja, nai onok toktsür orr, tanü kum ana ajunger. Saka nü temeim, temoatsü aser shisatsü tajung anogoshia menungra bilemtetter. Oja na onok mulungjang nung teti lir. Na Tsüngrem den anisüngzükdak lir ta amanger aser onok temulungjang anisüngzüker.

~ Temeim kinungertem

GOVERNMENT OF NAGALAND
DEPARTMENT OF HEALTH & FAMILY WELFARE
NAGALAND: KOHIMA.

NO.DHFW-3/VACANCIES/DRV/DTE/19-20 Dated, Kohima, the June 2025.

ADVERTISEMENT

In pursuance of the Government of Nagaland, Department of Health & Family Welfare approval letter No. HFW(A)-12/81/2019/200 Dated Kohima, the 9th May 2025, Applications are hereby invitedamongst the eligible candidates for filling up the under mentioned Driver posts as shown below under the Department of Health & Family Welfare, Nagaland. This is in compliance of the P&AR U.O.NO 1513 dated 25-03-2025 and concurrence of the Finance Department Vide RFC/ESTT.NO.35/27 dated 30-04-2025.

Sl. No	Designation	Pay Matrix Level	No. of Posts	Eligibility Criteria
1	Driver	Level - 3	10	a. Driving Licence. b. Class VII (Passed). c. Birth Certificate. d. Open for all indigenous inhabitants of Nagaland. (Certificate to be enclosed) e. ST/BT Certificate. f. 2 (two) Passport size photos.

- The minimum age of candidate shall not be less than 21 years and not more than 37 years of age as on or before 01.06.2025. The relaxation of upper age limit will be as per P&AR Department Office Memorandum Vide Order No.AR/GEN-6/7/2024/A/601 Dated Kohima, the 15th October 2024.
- The reservation of seats shall be as per the existing policy of the State Government as notified by P&AR Department Nagaland.
- Application Forms will be issued w.e.f17.06.2025 during office hour at Directorate of Health & Family Welfare (Room No. 310) at the cost of Rs. 300/- (Three hundred only)
- Last date of submission of formsalong withthe Documents will be on 05.07.2025.
- List of rejected application will be pasted in the office Notice Board.
- Issue of Admit Card w.e.f 14.07.2025 upto 19.07.2025.
- Driving test will be conducted on 29.07.2025 from 10:00 AM at Directorate of Health & Family Welfare.

(DR. MERENINLA SENLEM)
Director (HoD)
Directorate of Health & Family Welfare
Nagaland, Kohima

Keir Starmer-i Bangladesh Chief Adviser Yunus ajurutsü memulung

London, Aami/June 12 (Agencies): Bangladesh Chief Adviser Muhammad Yunus, indanga sensaksemba mali," ta shiba June 10 nungi 13 tashi United Kingdom semdangtar, pai UK Ato Kilonser Keir Starmer ajurutsü asüngdangba magizük ta ashir. Yunus ya Sheikh Hasina-i yimsüsüba mapang nübur sen billion aika pei asoshi rizünga ayuba tanaben meyipa agitsü meranga iba linük semdanger.

UK nung Yunus-i Starmer den senden mena United Kingdom indang King Charles III den ajuruteptsü imlaa liasü aser iba atema Awami League indang UK branch ajanga Downing Street dangi shiti ka yok, ta ashir.

Ajisüaka Starmer-i Yunu ajurutsü memulung, ta Financial Times osang ka ajanga ashir.

Taoba sorkari auyaba sen Bangladesh sorkar tasenbai bushiba nung UK-i yaritsüla, ta Yunus-i iba osangkaket dang ashir. Tang item sen ya timba

UK nung lir ta ashir.

"Ni pa (Starmer) den indang indanga sensaksemba mali," ta Yunus-i ashi. Bangladesh-i iba mapa inyakba nung Starmer-i yaritsü ta amanger, ta paisa ashi. "Ibai auyaba sen lir." Ajisüaka tangbo Starmer-i Yunus ajurutsü sentong kecha mali, ta UK sorkar ketdangsür temi ashir.

Sen bushiba nung UK sorkari teyari agütsür aser UK-i iba sen bushitetba nung Bangladesh yaritsü tim ta angatettsüla, ta Yunus-i ashi.

UK nungi tali jangrabangra yaridaktsütsü asoshi iba linük semdanger, ta Yunus-i ashi.

Taoba UK minister Tulip Siddiq-i Yunus den ajuruteptsü asüngdanga shiti yokba Bangladesh Chief Advisor's Office-i mangu, ta Deobarnü osang ka ajanga shia liasü.

"Tang tashi la nungi shiti kata mangu," ta Chief Advisor's Press Secretary Shafiqul Alam-i ashi.

NOA-i Olympic Day Run nung shilem agitsü tanurtem jaoker



Dimapur, Aami/June 12 (TYO): Nagaland Olympic Association (NOA)-i ayongzüka June 23 nü IG Stadium, Kohima nung Olympic Day amungtsü. Iba anogomung ya "Move, Learn, Discover - Together for a Better World" omen nung ajemdaker amungtsü.

Iba anogmung nung tongtibangtiba sentongji Olympic Day Run asütsü, koba tanur arishi küm 8 nungi 12 tsüngda alirtem atema ayongzüka track event ka lir aser iba ajanga Olympic tanüla ajungkettsü.

Ajak senteper tetoktepba balala atema sen lakh 1 senpet agütsütsü renema lir, aser iba ya atakzüka aliba arishi küm tsüngda alir tejangrara tanurtem ajak atema asütsü.

Olympic Day Run - Race Categories

A. 50 meters - Tebur aser Tetsür (22/06/2015 - 22/06/2016 tsüngda asortem)

B. 80 meters - Tebur aser Tetsür (22/06/2014 - 22/06/2015 tsüngda asortem)

C. 80 meters - Tebur aser Tetsür (22/06/2013 - 22/06/2014 tsüngda asortem)

D. 100 meters - Tebur aser

Tetsür (22/06/2012 - 22/06/2013 tsüngda asortem)

Asaya ya June 23 nü IG Stadium, Kohima nung asayatsü aser asayartem anepdang 8 ako tashi nungbo adenshitsü metetdaksüogo.

Asaya nung shilem agitsü atema tenüng züngoksemtsü asoshi May 31 nü tenzüko aser tatembangbuba anogoji June 17 asütsü.

Asaya nung shilem agitsü jangraratemi agüja aliba link nung QR code scan sütettsü mesüra NOA indang official social media handles tem semdanga züngoksemtettsü. Maneni NOA Office, Kohima nung offline form tem angutsü.

Osang tejangjaba agitsü atema iba number; 9362355375 nung tongteprateptsü metetdaksüogo.

Maneni asayamung ayongertemi tsürapur aser guardian tem dang iba asaya nung pei tanurtem shilem agidaksütsü aser parnok nongita yaritsü ayongzüko. Olympic Day Run ya asemtepba ka dang masü saka lanuwa, telongjem, health aser Olympic tanüla benjungba ka lir.

ISSF World Cup: Sift Kaur Samra-i bronze medal angu



Aami/June 12, 2025 (Agencies): Munich nung tang asaya aliba ISSF World Cup nung Brehostibarnü India tsür Sift Kaur Samra-i tetsür 50m rifle 3 positions event nung bronze medal ka nguogo.

Arishi küm 23 tain Samar, shibai 2022 Asian Games nung tetsür 50m rifle three positions event nung gold medal anguba mapang world record yanglua liasü, lai asayar ti asayaba final nung point 453.1 ngua liasü.

Norway tsür Jeanette Hegg Duestad-i point 466.9 ngua gold medal angu aser Switzerland tsür Emely Jaegg-i point 464.8 ngua silver medal ngua liasü.

Emely, shiba qualifications nung tekububa nung liasü, la top eight nung asayaba asayar ana ranking points atema dang asayaba ajanga final-i ia liasü.

Samra ya Punjab kübok Faridkot nungi lir aser lai qualifications nung kneeling, prone, aser standing nung point 592 ngua na tanabuba jenjang nung final atema qualify asü.

Iba küm tetenzüklen lai Buenos Aires nung World Cup nung gold medal ka ngua 2024 Paris Olympics nung junga masayatetaka takumbo season kanga junga tenzüka liasü.

Qualifications round nung France tsür Agathe Cecile Camille Girard (592) mezüngbuba nung aser Switzerland tsür Audrey Gogniat tasembuba jenjang nung liasü.

India tsürtem rongnungi Ashi Chouksey (589) 11buba nung, Anjum Moudgil (586) 27buba nung, Shriyanka Sadangi (582) 53buba nung aser Nischal 60buba nung liasü.

Lewandowski den mangatettep adokba sülen Poland Coach-i mapa toktsü



Aami/June 12, 2025 (Agencies): Poland national football team coach-i Brehostibarnü pa mapa toktsüogo. Nüngtugu striker Robert Lewandowski den mangatettep adokba sülen anogo ishika dang lir coach-i mapa toktsüogo.

"Tang tensa apir national team ajangzüksü atema telemtetba tajungtibaji ni head coach mapa toktsüba ya asütsü ta bilemer," ta Michal Probiez-i ashiba Polish Football Association sangdong ka ajanga metetdaksü.

Iba hopta tetenzüklen Finland den World Cup qualifier asayatsü lia Probiez-i Barcelona striker Lewandowski ket nungi team captain mapa agin aser Inter Milan midfielder Piotr Zielinski

captain tasenba asütsü shima liasü.

Iba jenjang agiba atema telangzüba agüja Lewandowski-i, Probiez coach inyakba mapang tashibo pa national team nungi masayatsü ta ashi. Iba sülen Poland team-i Finland ya goal 2-1 agi makok aser parnok qualify asütsü atema tetsükdaksü adokdaksüogo.

Arishi küm 36 tain Lewandowski-i otsüsütsüsa linük tenüng nungi 158 ben asayar lir aser pa ya Poland nung asayar ajak rongnung goal (85) timtiba idaksüba asayar lir. Pa ya Polish football puti otsü nung ajak dang asayar tajungtiba ta züngshir.

Lewandowski-i pa kanga belemogo ta shia Hokolbarnü

Moldova den friendly match ka asayaba nung masayatsü telemtetba agi.

Probiez shibai 2023 küm September ita Fernando Santos ket nungi coach mapa agizüka liasü, pa lenisüba nung par team 2024 European Championship atemabo qualify süogo, saka iba sülen junga masayateti arua liasü.

Polish Football Association tir Cezary Kulesza-i Bodhbarnü Probiez jaoka ken o sensaksema liasü.

"Ni coach tem nem parnoki mulungba ama inyakdaksüogo, saka iba denji khuret dena arur. Ajak dang tongtibangtibaji ni result tajung angutsü imlar. Tang ya fan tem aser national team atema mapang tamajung ka lir," ta Kulesza-i ashi.

WWC trials atema Arunachal nunger asayar 4 shimogo

Aami/June 12, 2025 (Agencies): Weightlifter Sambo Lapung, shiba 2025 Commonwealth Championship trials atema meshimi liasü, pa tang 2025 IWF Senior World Weightlifting Championships trials nung shilem agitsü shimogo.

Lapung den külemi Arunachal Pradesh nungi Kojum Taba, Markio Tario, aser Balo Yalam nungera taruba trails nung shilem agitsü shimogo.

Indian Weightlifting Federation-i ashiba agi, 2025 IWF Senior World Championships nung asayaba yimya ya 2026 Commonwealth Games atema asayartem shimba mapanga asadangtsü. 2025 IWF Senior World Championships ya Forde, Norway nung asayatsü.

Union Minister Kiren Rijiju-i takaratiba nung jenjang agiba sülen Lapung trails atema shima liasü. Arunachal Olympic Association Secretary-General Bamang Tago-i ken o bentettsü atema minister-i teyari agütsüba atema pa dang kanga pelaba lemsatepogo.

Commonwealth Championship trials nung Lapung shilem magidaksüba

ajanga taitsuba aika adokogo aser IWF-i asayar bendanga amshir ta shia parnok aija liasü.

Iba dak sendakba nung East Kameng Social Welfare & Cultural Organization-i Rijiju nem temepishiba ka agütsü aser Lapung meshimba ya fairness aser transparency anema lir ta ashi.

Arunachal Olympic Association-ia, iba telemtetba agiba atema federation dang ken o rasa ashitsü takhangba ka agüja liasü.

Lapung-i tang tashi nung Chandigarh (2022), Itanagar (2023), aser Himachal Pradesh (2024) nung Senior National Weightlifting Championships nung gold medal ngur lir.

Kasa mapang nung Arunachal Pradesh nungi Weightlifter Tara Pungni, Tinku Golom, aser Tayar Ronik nungera 2025 Commonwealth Youth, Junior, aser Senior Weightlifting Championship, Ahmedabad trails atema shimogo.

Temetettsü kaji ketdangsürtemi Tara Pungni selection trials nung shilem magitsü atema temelaba agütsüogo, koba June 29 aser 30 nü Patiala nung agitsü.

BILEMDANGANG

"Mapa tila ka dang süaka temeim agi inyakang."